

Umbwegh/weder vergebner Linie noch Punct/gezogen noch gemacht werden darff/wie sonst in
gemainem vorigen alten vnterricht/derselben irr weg vnzechlich viel fürfallen/welches den ient-
gen wol bewußt/so sich lange zeyt im selben tieffen vnd verdrißlichen weg umbgewüstet haben/
do einer biszweylen in die zehen Linien hat machen müssen/ehe er zu einiger komen ist/die zu seyn-
nem vorhaben dienstlich vnd fürträglich gewest/das man hierin gar nicht bedarff/dan̄ ich rede
auß erfahrenheit/vnd ist mir etwas sauer worden/hab auch keinen Kosten/fleyß/mühe noch
arbeit gespart/bis ich durch Gottes gnade auff diese pan gerathen bin/darob mir nun mehr ge-
nugt/es ist darzu ein arbent ohn verdruß/dieweil kein vergebne Linie gezogen werden darff/vnd
do einer einmal vom angesangnen seinem werck gehet/find er als baldt/so er wider darüber
kumpt das endt/do ers vorhin gelassen/ohn verdrißlichs umbschawen.

Damit ich nun den begirigen diser Kunst/hierin dienen möchte/hab ich mir fürgenumen/
die sunff Corpora Regularia,dauon Euclides in seinem 13. buch Elementorum handtlet/des-
gleichen der hochberühmte Griegisch lehrer Plato in Timæo,dieselben fünf Körper/mit grosser
verwunderung beschreybt/vnd daneben anzeigt/so wenig möglich sey/das über die vier natür-
liche Element/vnd derselben fünfte wesenhent/noch andere mehr Elementa in der natur finde/
so wenig können auch andere mehr Corpora regularia/das sind andere mehr Körper von gleich
förmigen/vnd gleich grossen Pöden gemacht werden/dazu so vergleicht er noch dieselben fünf
Körper den Elementen der natur selbst/dan̄ gleicher weyß/wie der Pyramis Trilaterata,neim-
lich/der kegel oben zu gespißt ist/also hat auch das fewer vnd flammen obenseine spitzen/ Item
wie das Erdtrich ein last vnd schwerlich zubewegen ist/also ist der Cubus oder würffel/schwer-
licher zubewegen/als der ander Körper einer/dieweil seine Pöden/das quadrat/gros vnd hart
aufligendt ist/vnd wie alle andere irrdische Körper/von disen vier Elementen der Natur zusä-
men gesetzt vnd miscirt werden/in den lebendigen creaturen/als menschen vnd vieh/sowol/als
in den Vegetabilibus. Neimlich laub vnd gräß/sowol werden auch ander Geometrica Corpora
aus disen sunff Corporibus,ohn endlich miscirt vnd zusammen gesetzt/wie in discm meinem vor-
habenden werck/in die 140. unterschiedliche Körper geschen werden/ganz vnd durchsichtig/
Ich hab aber sonderlich diese Körper in meiner neuen Perspectif gebrauchen wöllen/dieweyl sie
mancherlen vnd viel unterschiedliche Eckh/schthen/winckel vnd spitzen/einwartz vnd außwartz
gekehrt haben/den jungen anfahenden diser Kunst/vrsach zugeben vnd sie damit zu raitzen/der
Kunst mit fleyß nachzudencken/vnd solchs zu allerlen andern sachen fernier haben zu appliciren
vnd zu gebrauchen. Bit demnach freundlicher lieber leser/du wölst solchen meinen fleyß getrew
hertziger guter mainung aufnemen/vnd da ich die dankbarkeit spürn/werde ich geursacht/den
andern thayl berürtswercks/auch hinauß komen zulassen.Dan̄ ob ich wol gewilt gewesen/das
ganze werck mit einander getrewlich an tag zubringen/vnd truckhen zulassen/so hat es doch
anderer meiner obligender geschefft/vnd arbeit halber dismals nit alles zugleich disponirt vnd
ins Kupffer zusammen geordnet werden mögen/es soll aber doch/der bemelt ander theil/durch
mittel gottlicher gnad aufs fürderlichst auch dem gemeine nutz zu gut ans liecht gelangen.Wil
darneben ich/freundlicher lieber Leser gebetten haben/ob vielleicht in berürttem meinem wercke
(welches ich erstlich alles selbst/mit meiner schweren handt gestellt vnd gemacht/Vnd darnach
durch den Künstliche Jobst Amman von Zürich/aus denselben ins Kupffer reisen hab lassē)
biszweylen ein Linie verzogen worden wer/so wollestu doch solchs nach deiner güt vñ freundli-
keit zum besten deuten/vnd nit als ein mangel der Kunst/sondern meinem alter/vnd der eyl so
das werck herfordert hat zu messen/dieweil alle menschen in gleichem fall/gar bald etwas
irren vnd überschén mögen. Dan̄ solchs(wils Gott)im andern theil alles wider völ-
liglich herein gebracht werden soll/die genade Gottes sey mit vns allen/Amen.